



UKA 2017/42

19/10-2017

Justus Hansen

Qanoq iliorluta mingutsitsineq annikillisarniarlugu eqqaanermut atortut puussiat plastikiusut atorunnaariartortinnissaannut suliniuteqassanerluta apeqquteqaat aallaavigalugu Inatsisartunut oqallisissiasatut siunnersuut.

(Inatsisartunut ilaasortaq Mimi Karlsen, Inuit Ataqtigiit)

Inuit Ataqtigiinnut qujanaq manna oqallinnissaq aallarnermassuk.

Demokraatini isumaqataalluinnarpugut sapinngisatsinnik puussianik plastikkinik atuinerput millisartariaqaripput. Taamaakkaluartorli qanoq iliornissatsinnut siunnersuuteqartup nammineq siunnersuutai amingaatigaagut. Oqallissaarummi taamaallaat eqqaaneqarpoq ajornartorsiut, siunnersuuteqarfigineqaranili qanoq iliortoqassanersoq. Tamanna ugornarpoq.

Uppernarsaatissaqarpoq uangut kalaallit plastikkimik mingutsitsinermit toqqaannartumik sunnigaasut aalisakkat allallu uumasut aqutugalugit. Uanga nammineq paniga GUX-mi atuaqatinilu tamanna uppernasinikuuat, misissoramikkut aalisakkat uumasullu qanoq plastikkeqartiginersut. Misissuinerterik karakterimik 12-mik pissarsissutigaa.

Demokraatit isaanni matumani pineqarpoq innuttaasut paasitinnissaat puussianik plastikkinik atuijunnaassasut.

Aningaasartaqarnissaalu iluaqutaajuannarpoq. Politikkikkut periarfissaqarpugut puussianik plastikkimik sanaanik akisunerulersitsissalluta akitsuusersuunitsigut. Akitsuusiinerup iluaqutissartaraa landskarsi aningaasanik amerlanerulaartunik isertitaqassamat. Akitsuusinermulli pingaarnertut siunertaassaaq innuttaasut ileqqutoqqaminnik allanngortitsinissaat, eqqarsaatiginerulaalerlugu assersuutigalugu pooqattanik pisiat puuannik atoqqittakkanik atuisalernissartik. Tassunga atatillugu tikkuarusupparput, Demokraatit tungaanniit aningaasanut inatsisissat arlallit isumaqatigiinniutiginerini siunnersuutigisarsimagatsigu puussiat plastikkimik sanaat tunineqarneri tamaasa 1 koruunik toqqaannartumik akitsuusiisarnissaq.

Alla suliniutigineqarsinnaasoq tassaavoq ileqqutoqqanik allanngortitsiniarluni qaammarsaanissaq assersuutigalugu Facebook aamma Youtube atorlugit, tassani videoliat naatsut atorlugit siunnersuuteqartoqaqattaarsinnaavoq ulluni naliginnarni puussiat plastikkit sunik taarserneqarsinnaanersut.

Oqallilluartoqarnissaanut qilanaarpugut aamma qilanaarpugut partiit allat Naalakkersuisullu ilanngussassaannut.